



Պարույր Սևակ

Երբ աչքերն են սառում

Մենակություն բառից դողդողում է օդը իմ սենյակի:

Ու ես հասկանում եմ,

Որ աչքերն են մարդու ամենաթաց տեղը...

...Երբ աչքերն են սառում՝

Ասում են, թե՛ ա՛յ-ա՛յ՝ մարդ է գալու:

Բայց դա եթե սուտ չէ,

Ապա բարություն է,

Որ ծնվել է միայն խեղճությունից:

Իմոնք էլ են սառում:

Սակայն դու չե՛ս գալու:

Դու չե՛ս կարող: Գիտե՛մ:

Եվ օդը սենյակիս

Պիտի շարունակի մենակություն բառից անվերջ դողալ՝

Հարուցելով իմ մեջ այն միտքը հին,

Թե վիհերը գուցե նրա համար են լոկ,

Որ մարդ ներքև նետվի:

Իսկ թե վիհերն իրոք նրա համար են լոկ,

Որ մարդ ներքև նետվի՝

Այդ դեպքում ես

Ինչպե՞ս անեմ.

Կո՛ւժ չեմ,

Կուժկոտրո՛ւկ եմ.

Չե՛մ կոտրվում, միայն փետրվո՛ւմ եմ,

Եվ դրանից արդեն ես հոգնել եմ,

Ինչպես թուղթն է հոգնել իմ ջանքերից՝

Հեովից-հեռու ասել քեզ երկու բառ,

Որ կարող է նո՛ւյնքան ինձ թարգմանել,

Որքան թարգմանում է ինքնաթիռին հավը...

Սուտ կա, որ ճիշտ արժե:

Ու ես հավատում եմ մեր հնարած ստին,

Թե չենք կորցնի իրար:

Վախ կա, որ մահ արժե:

Ու ես վախենում եմ, թե կհաղթի կյանքը,

Եվ կմնամ ցավի խեղճ պատմաբան միայն:

Ու, վերջապես, քայլ կա, որ հենց թռիչք արժե:

Եվ ինձ դուրս եմ քաշում իմ մտքերի միջից,

Ինչպես առողջ ակռան բերանից են քաշում:

Բայց հոգնել եմ արդեն

Եվ հոգնել եմ այնքան,

Որ չեմ զգում ոչի՛նչ,

Ցա՛վ չեմ զգում անգամ:

Ա՛յ թե հնար լիներ չզգալ նաև,

Որ աչքերն են մարդու ամենաթաց տեղը...

03.X.1961թ.

Երևան